

桐城
龍溪
漢
最亮

傷寒五法
三

新刻陳養晦先生傷寒五法卷五

天都陳維坤子厚重訂

雲間夏之昇東步叅較

傷寒賦

太陽則頭疼身熱脊強

太陽者陽之開也頭痛者以其脉從巔絡腦也三陽俱有頭痛不若此經爲甚身熱者寒邪閉塞腠理邪始中之內不得通於臟腑外不得越於皮毛鬱於腠理乃翕翕發熱如火燎然邪在表也熱病

論云人之傷於寒也則爲熱病熱雖甚不死者
本經二絡流行之處邪客之經脉不得流通故強
凡見此皆邪舍太陽爲表之表也

續補

靈樞經脉篇曰膀胱足太陽之脉起於目
內眦上額交巔其支者從巔至耳上角其直者從
巔入絡腦還出別下項循肩膊由夾脊抵腰中入
循脊絡腎屬膀胱以下貫膈內出外踝之後循京
骨至足小指外側此太陽經絡流行之處也本經
屬水正司冬寒之令故寒得以侵之凡邪自外入

內者必自此經始其中也或從項或從背或從風
府或從足下皆邪入之門戶既入之後其在顛也
則頭痛連腦而兩太陽痛甚其在項也則兩肩膊
內痛而項強不得轉側其在背也則脊強而腰痛
甚皆症之現於外者且此經又有風寒之分風者
陽也寒者陰也衛者氣也營者血也易曰雲從龍
風從虎水流溼火就燥物各從其類也然風陽而
衛陽今風傷衛而不傷營乃陽從陽也寒陰而營
陰今寒傷營而不傷衛乃陰從陰也氣被風傷則

不能衛故自汗汗去則血衰脉者血之府也血既去則脉浮而緩况風性溫屬陽陽主流行則而光而微煩用桂枝湯解肌實表使風邪去而汗止是太陽傷風證也血被寒侵凝塞而不行道路壅遏不得通利則脉浮而緊况寒性屬陰陰主澁滯則面慘而手足微厥用麻黃湯開泄腠理使寒邪去而氣血流通是太陽傷寒症也二者均係太陽故有風寒營衛之別桂枝證誤服麻黃則腠理愈開而自汗愈甚令人亡陽麻黃證誤服桂枝則腠理

愈閉而邪不得出令人煩悶二證又不可不審者
也然膀胱主藏津液假外甚急則入本腑而腸胃
如故外見太陽諸表證內但溺赤耳此太陽邪入
本腑不可遽以溺赤爲裏證誤用攻裏藥則表邪
乘虛入胃爲結胸痞氣等證矣其脉兩寸浮久則
尺寸俱浮盛者人迎大再倍於寸口虛者人迎反
小於寸口也



太陽傷風桂枝湯太陽傷寒麻黃湯二法

春加黃芩夏加白虎太陽有煩躁大青龍湯太陽

腑病五苓散

陽明則目痛鼻乾不眠

陽明者陽之闔也內經云兩陽合於前故云陽明
目痛者以其脉絡於目也鼻乾者本經之脉自目
下鼻也不眠者氣逆不得從其道也逆調論云陽
明者胃脉也胃爲六腑之海其氣下行今陽明病
則氣逆不得從其道故不得眠也凡此皆邪舍陽
明宜解散之此表之中者也

續補

靈樞經脉篇曰胃足陽明之脉起於鼻之

交額中上約太陽之脉下循鼻外入上齒中挾口
環唇下交承漿出人迎入頰車過人迎循喉嚨缺
盆下膈屬胃絡脾以下由髀關抵伏兔下膝臑循
脛外廉入足大指內此陽明經絡流行之處也本
經屬土司令四季在人身體主肌肉凡邪依次而
傳者始受必太陽故太陽必傳陽明其病或目痛
或鼻乾或唇焦漱水不下或不眠而煩皆本經證
之可據也此經有經腑二證經則發熱目痛鼻乾
唇焦漱水不欲嚥腑則惡熱便閉狂譫手足掌心

澌然有汗故經則可汗腑則可下然經者徑也在
身體之中腑者器也居五臟之內經曰陽明者中
也萬物所歸之處邪氣至此再無所傳已凝聚結
實然邪或自太陽經而徑入腑者仲景名曰太陽
陽明有或自本經而入者名曰正陽陽明或自少
陽而入者名曰少陽陽明總爲入腑皆可下之若
邪在表而內無腑證現於外者此經病也徑宜解
肌誤攻之邪必乘虛陷入爲痞氣懊懣等證矣若
不分經腑槩以大柴胡投之往往殺人蓋大柴胡

湯治陽明腑病而有便閉者烏得不分經腑而槩用之乎間有一二擬之曰小柴胡湯解表藥也大柴胡湯攻裏藥也何可以大柴胡反居小柴胡之前也不依經文自揣已見而以少陽居陽明之先是尤可笑也然竟入內者陽明之腑也次第傳者陽明之經也腑則用大柴胡湯三承氣湯經則用升麻葛根湯及柴葛解肌湯又烏得以少陽反居陽明之先哉觀之內經以太陽爲開陽明爲闔少陽爲樞故開司外闔司中樞司內未聞以闔樞反

爲開者也陽明之脉尺寸俱長盛者人迎三倍於寸口虛者寸口反大於人迎也

湯法

陽明經病升麻葛根湯及柴葛解肌湯陽明腑病輕者大柴胡湯重者三承氣湯若自汗口渴甚大便未閉亦陽明腑病白虎湯

少陽耳聾脇痛寒熱嘔而口爲之苦

少陽者陽之樞也耳聾者以其脉上絡於耳也脇痛者本經循腋布脇下足也寒熱者陰陽相半也蓋本經已前則太陽陽明至此已將入裏矣本經

以後則有太陰少陰若曰入陰則又尚在陽經云
表不可裏又不可蓋寒陰而熱陽也今邪居中是
以陰陽相半而寒熱往來也嘔者邪入裏也裏不
納邪邪正分爭故嘔然嘔雖出於胃正屬少陽部
分謂之已在胃腑則當凝結而不嘔矣今嘔者邪
方入裏也故曰屬少陽苦者膽之汁也今邪舍膽
經熱泄本汁故曰苦凡此皆在少陽爲表之裏也

續補

經曰膽足少陽之脉起於目銳眥下耳後

循頸入缺盆下腋布胸脇至外輔骨之前循

足跗上入小指次指之間此少陽經絡流行之處也本經屬木司令爲春凡邪依次第而傳至者名曰半表裏其病或耳聾或脇痛或往來寒熱而嘔吐或胸中脹滿而口苦此少陽症之可見者也此經有三禁汗吐下也蓋六腑俱有出入之路唯膽清淨不受濁物無出亦無入故汗吐下皆禁焉只有小柴胡一湯加減和解若誤用他藥變爲壞病此少陽之難用藥者如此也其脉尺寸俱弦盛者人迎大一倍於寸口虛者人迎反小於寸口也



小柴胡湯加減法載於本湯之下

太陰腹滿自利尺寸沉而津不到咽

太陰者陰之開也腹滿本經所居宮室也邪入剋之則脾氣不運故滿然浮爲邪在表沉爲邪在裏今脉沉者知己在陰經矣自利者邪入臟也蓋脾與胃相爲表裏以居則脂膜相連今邪舍脾臟亦將入腑是以腹滿而利津不到咽者脾之脉上膈挾咽而連舌本脾爲胃行其津液者也熱邪感於臟則津液不得上潤於口故津不到咽凡此皆邪

傷寒五注
七
舍太陰爲裏之表者也



經曰脾足太陰之脉起於大指之端循指
內側白肉際過核骨後上內踝前廉循脛骨交膝
股內前廉入腹屬脾絡胃上膈挾咽連舌本此太
陰經絡流行之處也本經屬土與胃相爲表裏職
司運動能布散津液於周身其爲病或腹滿或自
利或腹痛兩手足自溫或身黃而津不潤咽澀此
太陰症之可見者也此經有寒熱二症熱者邪自
陽而入陰寒者不出陽經而竟中者也故寒則自

利鴨澹口不渴而腹微痛宜甘草乾薑以溫之熱
則口渴津液不潤於咽而腹痛甚宜黃芩白芍以
清之然二者既名曰陰則外無一毫表症若表症
尚在兼有太陰症見者是邪未悉入於陰又當先
解表而後攻太陰至於腹痛甚者則宜桂枝大黃
湯蓋桂枝以解外邪大黃以攻陰邪耳其脉尺寸
俱沉細熱則沉而滑寒則沉而遲盛者寸口脉大
三倍於人迎虛者人迎反大於寸口也

熱症黃芩白芍湯腹痛者小承氣湯有表

兼腹痛者桂枝大黃湯寒症甘草乾薑湯理中湯
太陰發黃茵陳五苓散甚者茵陳大黃湯

少陰舌乾口燥

少陰者陰之樞也舌乾者以其脉循喉嚨而挾舌
本也口燥者津液不潤澤也熱灼於腎液不上升
故口燥夫心者火也腎者水也心爲君主腎爲君
后水升火降合成坎離既濟之象在身體則骨正
筋柔在臟腑則各司其職在九竅則五液出者出
而潤者潤矣夫人腎氣上通於咽開竅於舌下故